


OR DAL DICZIUNARI RUMANTSCH GRISCHUN

## Drags e pops



Drag derivonts d'ina casa spazzada a Cuera

Foto DRG

### Il scolar dalla Scola nera ed il drag

Inaga ei in student dalla Scola nera staus a maner en l'alp Russein.

La sera ha il scolar entschiet a sunar e lu detg al signun, ch'el deigi mirar en tschaler, co ils curters sbalunien. Il signun ha mirau en tschaler e viu, co ils curters parevan da siglir in sur l'auter. Plein tema ha el supplicau il scolar dalla Scola nera da po calar da sunar, ch'il latg mondi buca tut sutsu.

In mument ha il scolar dalla Scola nera calau cun sia musica. Mo beingleiti ha el puspei entschiet a sunar pir che mai e detg al signun, ch'el deigi mirar en treglia, co la fumeglia serocli. Cura ch'il signun

ha mirau si, seruclava la fumeglia tutta in sur l'auter ora.

Quei scolar dalla Scola nera ha alura raquintau, ch'el seigi vegnius en l'alp per leventar si e menar dil Rein giu in drag, che devastassi tutta la vallada. Sch'els veglien mirar, co quei mondi tier, sche deigien els vegnir l'auter di en tal e tal liug e sefermar cun terscheuls vid ils pli gronds pégn, ch'il drag possi buca trer els tier sesez.

Il signun e sia fumeglia havevan grondas marveglias da mirar tier, co i mondi. L'autra damaun bein-marvegl han els cumpignau il scolar dalla Scola nera in toc ed han seligliau vid ils gronds pégn, ch'il scolar ha encuretge ora.

Lez ha lu entschiet a sunar, e tutteninagada ei in terribel drag vegnius sut la greppa ora. Il scolar dalla Scola nera ha bess al drag in cavester sul tgau, ei semess sin el a cavagl e scurrentaus cun el dalla val giuado che la crappa deva fiug.

Cura che la fumeglia ha viu il drag, targeva el els cun tala forza tier sesez, ch'ils pégn sezuccadevan sco caglia triembel.

### Il scolar dalla Scola nera che sa l'ura

Inaga ei in student dalla Scola nera staus a quartier tier la famiglia en la casa da Sontga Maria. Mintga ura, che deva, scheva el: «Buca quella ura, in'otra». Cura ch'ei ha dau las dudisch da miezdi, ha el detg: «Quella ura e buc in'otra». Ed en la medema ura ha la dunna dalla casa survegniu in pop.

### Il scolar dalla Scola nera ed il crap or' il Piogn Ault

In scolar dalla Scola nera, che mava per la via veglia a Mustér, ha detg, ch'il crap sper il Piogn Ault a Pardomat vegni inagada menaus ora el Plaun Surrein.